

Einræðisherra

Skottast þú nú og sæktu hlýju sængina mína, því ég ætla að þykjast fara að sofa. Pakkaðu mér þéttingsfast inn í þessa silki sæng svo ég svitni, því ef ég svitna hef ég góða ástæðu til að vekja þig upp af þínum lausa svefni.

Ég finn svitann seitla niður vinstri vangann. Hann drýpur niður í vöggu mína. Ég hljóða eftir hjálp og þú birtist á augabragði. Ég bið þig um volga mjólk en þú ert svo klaufsk að þú sullar henni yfir þig. Ég gæti allt eins gert þetta sjálfur. Þegar ég hef lokið við mjólkina og búinn að ropa mátt þú pakka mér inn rétt eins og þú gerðir áðan.

Nú er ég útsofinn og þér ber að klæða mig og næra. Gefðu mér þetta gula. Reyndu að vera rösk svona til tilbreytingar. Á meðan þú sóttir þetta gula hugsaði ég mig betur um svo nú vil ég það rauða. Færðu mér það rauða. Þetta rauða lyktar illa, ég hef aftur skipt um skoðun. Ég vil þetta gula. Mataðu mig, þerna. Þurrkaðu mér um munninn, þerna. Ái! Ekki þurrka mér svona fast.

Nú vil ég fara að hitta jafningja mína. Færðu mér hlýja úlpu, húfu og stígvél. Ég vil að þú komir mér fyrir í glæsikerrunni og spilir tónlist við hæfi. Fínt, þú gast komið mér á meðal jafningja minna, nú skalt þú láta þig hverfa.

Farðu Sebastián, ég er að einbeita mér að þessari nákvæmni teikningu af glæsihýsi sem mun rísa við hlið tjarnarinnar. Farðu Sebastián, nú er ég að einbeita mér að því að byggja glæsihýsið í smærri mynd. Ef þú hættir ekki að ergja mig, herra Sebastián, þá ertu ekki velkomin í veisluna sem verður haldin mér til heiðurs á eftir.

En hentugt, vagnstjórinn er kominn til að koma mér í höllina. Settu mig niður hér vagnstjóri, ég er hungraður. Færðu mér mat. Ég skal borða sjálfur, ekki mata mig. Færðu mér servíettu, ég ætla að þurrka mér um munninn. Færðu mig í hinn stólinn og réttu mér þetta bláa verkfæri, hirðfífl. Beygðu þig nú og réttu mér þetta bláa aftur, því ég missti það.

Berðu mig í vagninn minn og ýttu mér með handafli niður að tjörninni. Ég vil gefa fuglunum brauð. Ég finn vindinn blása í andlit mitt og honum fylgir þreyta. Ég ætla að sofa á meðan þú ýtir mér um götur borgarinnar. Komdu mér heim í höllina, teitið fer að hefjast. Klæddu mig í fallegu fötin sem þú keyptir á mig og greiddu í gegn um hár mitt.

Velkomnir vinir, leggið gjafirnar á borðið þarna. Þerna, komdu með tertuna. Sjálfur ætla ég að leiða sönginn en allir skulu taka undir.

Hann á afmæli í dag, hann á afmæli í dag, hann á afmæli hann Adolf, hann á afmæli í dag.

Hann er eins árs í dag, hann er eins árs í dag, hann er eins árs hann Adolf, hann er eins árs í dag.